



Statutas dalla societad da musica Danis-Tavanasa



STATUTAS DALLA SOCIETAD DA MUSICA DANIS-TAVANASA

I. NUM, DOMICIL ED INTENT

- Art. 1 La societad da musica Danis-Tavanasa ei fundada ils 10 da schaner 1920, tenor artechel 60 ff dil cudisch civil svizzer.
- Art. 2 Igl intent dalla societad da musica Danis-Tavanasa ei da far musica, d'embellir festivitads e da tgirar la cumpignia.

II. COMMENBERS, DRETGS ED OBGLIGAZIUNS

- Art. 3 La societad da musica secumpona ord:
- commembers activs
 - commembers d'honor

Art. 4 Commembers activs

Mintga commember activ ha il dretg da:

- votar
- vegnir elegius
- in instrument ed ina mondura

Mintga commember ei obligaus da:

- assister alla radunonza generala
- vegnir suenter allas obligaziuns finanzialas visavi la societad
- segidar tenor meglier saver e puder en tuttas spartas organisatoricas ed auters pensums che crodan tier

Art. 5 Commembers d'honor

Commember d'honor sa ina persuna ch'ei sefatga grondamein meriteivla per la societad da musica vegnir numnada entras la radunonza generala. In commember ch'ei staus 15 onns activs en la societad da musica Danis-Tavanasa daventa commember d'honor da nossa societad. Il commember d'honor ha il dretg da prender part alla radunonza generala cun vusch cusseglianta e far part da tuttas producziuns gratuitamein.



Art. 6 Commembers novs

La damonda da daventar commember ei da drizzar alla suprastonza. Sur da recepir novs commembers decida la radunonza generala. Mintga commember niev obtegn las statutas e s'oblighescha da setener vid quellas.

Art. 7 Contribuziuns

Las contribuziuns dils commembers vegnan fixadas dalla radunonza generala sin proposta dalla suprastonza.

Art. 8 Extrada

In'extrada ord la societad ei da drizzar a scret entochen igl 1. da settember digl onn current alla suprastonza. Duess in commember esser necessitau da bandunar la societad sto el metter siu instrument e sia mondura a disposiziun alla societad e piarda tut dretg enviers quella. In commember activ sa vegnir sclaus dalla societad e piarda tuts dretgs sco commember activ, sche el cunterfa ad art. 4 ni ord auters motivs gravionts.

III. ORGANISAZIUN

Art. 9 Ils organs dalla societad ein:

- a) la radunonza generala
- b) la suprastonza
- c) ils revisurs da quen

Art. 10 La radunonza generala

La radunonza generala ha liug mintg'onn enteifer il meins d'october ni november. L'invitaziun duei mintga commember obtener 10 dis avon la radunonza. Las decisiuns ed elecziuns vegnan pridas cun maun pli. Sin giavisch d'in u plirs presents sto ei vegnir menau atras cun scrutini.

La suprastonza, ils revisurs da quen ed ulterius uffecis vegnan elegi entras la radunonza generala per dus onns, il responsabel musical per in onn. Ina reelecziun ei pusseivla.



Art. 11 Radunonzas generalas extraordinarias san vegnir convocadas entras la suprastonza ni sin esprimiu giavisch da silmeins 1/3 dils commembers activs.

Art. 12 Tractandas dalla radunonza generala annuala ein:

1. Appel ed elecziuns da dus dumbravuschs
2. Protocol
3. Rapport annual dil president
4. Rapport dil responsabel musical
5. Rendaquen, rapport dils revisurs ed approbaziun dil quen annual
6. Contribuziuns
7. Recepziun da novs commembers
8. Demissiuns
9. Reglements
10. Program da lavur ed eventuals credits
11. Elecziuns
12. Varia

Art. 13 Propostas da commembers che vulan vegnir risguardadas silla gliesta da tractandas ein d'inoltrar en scret alla suprastonza entochen igl 1. da settember.

Art. 14 Ina revisiun da questas statutas ei resalvada alla radunonza generala. Quella ei habla da decider sche silmeins 2/3 dallas vuschs presentas giavischan ei.

Art. 15 La suprastonza

La suprastonza consista ord:

- a) president
- b) actuar (vice-president)
- c) cassier

Art. 16 La suprastonza ei igl organ executoric dalla societad. Ella diregia las fatschentas administrativas/organisatoricas. Per la societad segnan il president ed igl actuar comunablamein. Ella ha il dretg da disponer dad entochen 500.-- francs per cass.



- Art. 17
1. **Il president** survigilescha e coordinescha las fatschentas dalla societad. El empeila las radunonzas e representa la societad anoviars. Medemamein exequescha el la corrispondenza e procura il rapport annual.
 2. **Igl actuar** redegia il protocol da radunonzas, sesidas da suprastonza ed outras sedutas. El remplazza il president en cass d'absenza.
 3. **Il cassier** procura il traffic da cassa ed administrescha la facultad dalla societad. El ei responsabels pigl incasso dallas contribuziuns. El tegn la suttascripziun pil traffic bancari e schec postal.

Art. 18 Ils revisurs da quen

Ils revisurs da quen controlleschan il quen e rendan rapport alla radunonza generala.

Art. 19 Ulterius uffecis

1. Il responsabel musical ei responsabels per la part musicala, meina ils exerchezis e las produenziuns e stat a disposiziun alla suprastonza cun vusch cusseglienta.
2. Ils administraturs da material han quitau e bien uorden per tut material dalla societad. Els meinan in cudisch d'inventari, remplazzan e completeschan material tenor basegns.

Art. 20 La cumissiun da musica secumpona dil responsabel musical e dus commembers che vegnan elegi dalla radunonza generala. Ella ei in organ cusseglient dalla societad da musica e segida cul responsabel musical.

Art. 21 Visavi obligaziuns dall'uniun garantescha sulettamein sia facultad. Commembers san buca vegnir fatgs responsabels per deivets dalla societad da musica.



IV. DETERMINAZIUNS FINALAS

Art. 22 La sligiazion dalla societad sa mo daventar ad ina radunonza generala en la quala 2/3 dils commembers activs ein presents. Sche 1/3 dils commembers presents opponan ad ina sligiazion sa quella buca daventar. La facultad dalla societad croda en favur dil vischinadi en cass che negina societad cul medem intent vegn fundada enteifer 10 onns dapi la sligiazion.

Questas statutas ein vegnidadas renovadas ed approbadas alla radunonza generala dils 27 da november 2021 e remplazzan tuttas statutas d'entochen da cheu.

Danis-Tavanasa, ils 27 da november 2021

Il president:

Clau Maissen

Igl actuar:

Pieder Blumenthal